

Comision Celebracion Dianan Nacional ta informa

Luna Cultural y di Celebracion Nacional relaciona cu 30 aña Status Aparte, 40 aña Himno y Bandera

ORANJESTAD – Comision Celebracion Dianan Nacional bou auspicio di Ministerio di Cultura ta trahando cu un entusiasmo halto mirando cu nos tin varios actividad den luga di maart pa e celebracion grandi aki di 30 aña Status Aparte y 40 aña di nos Himno y Bandera.

Un dedicacion den grandi pa Aruba su logro y celebracion como pais. Un celebracion cu sigur ta yena cada un di nos cu hopi orguyo y no por pasa esaki sin mas. Pa varios aña caba luna di maart ta un luna cultural y e biaha aki lo tin un programa extenso durante luna di aki. Ta habri luna cu e Festival Un Canto na nos Himno y Bandera infantil y hubenil cu aña pa aña tin su popularidad riba dianan 4 y 5 di maart na Plaza Turismo (Linear Park).

Mucha den categoria infantil y hobennan den hubenil ta participa cu composicionnan nobo di nos musica tipico demostrando asina e amor cu tin y pa haci nos cultura rico. Inscripcion pa 'Poeta di Patria' a habri caba y ultimo dia pa entrega bo poesia lo ta diahuebs 10 di maart venidero. Djis manda bo poesia via fundacion.lanta.papiamento@gmail.com y poetadipatria@gmail.com. Festival Un Canto pa Aruba su Himno y Bandera cu ta e festival den categoria di adulto, e aña aki sigur lo kibra tur expectativa. Un total di 34 participante a inscribi y lo keda acompaña pa un total di 19 banda. Un festival di e magnitud aki mester keda reparti riba e fechanan di 11, 12 y 13 di maart. Mirando e calidad di aña pasa cu a ser presenta den composicionnan.

Esaki ta e luna unda nos artistanan por demostra nan talen-

to, aprecio y amor pa nos pida baranca.

Esaki ta di tres aña cu e poetanan por competi cu nan poesia pa e premio Poeta di Patria. Riba dia 14 di maart lo ta tuma luga 'Poeta di Patria' den Fort Zoutman pa 7'or di anochi. Bini y declama cu forbor demostrando cu Aruba ta rico den talento y creatividad.

Dia 17 di maart ta bay tuma luga e acto protocolar riba Plaza Monumento 18 di maart brindando honor na cada un di e personanan cu a forma parti di e gran lucha pa nos Status Aparte. E programa lo inicia pa 5'or di atardi caminda mandatarionan y invitadonan special lo ta poniendo nan ofrenda floral na e plaza, conmemorando asina e 30 aña di nos Status Aparte.

Di biaha despues di e actividad di Plaza Monumento lo sigui riba e mesun fecha di 17 di maart caminda Aruba henter

ta keda invita pa presencia e Manifestacion Cultural riba nos Plaza Libertador Gilberto François 'Betico' Croes y cera conoci cu un plaza completamente renoba.

Un manifestacion caminda nos artistanan local y talentoso lo engrandece nos herencia cultural y esaki ta keda traspasa di un generacion pa generacion. Show di e anochi aki lo consisti di actuacion, baile, canto, declamacion, y musica. Arte lo briya den un fiesta completo celebrando asina 30 aña Status Aparte y 40 aña di nos Himno y Bandera. Na final di anochi lo tin ritmo contagioso pa publico baila y gosa cu e banda N.B.O. y pa cera e gran celebracion aki lo tin Robert y su Solo Banda Show.

Riba dia di Himno y Bandera mes cual ta 18 di maart venidero, nos celebracion nacional, ya ta varios aña caba pueblo ta bini hunto dilanti Oficina di Gobernacion unda lo tuma luga e acto protocolar den ora di mainta. Musica ta den man

di orkestra nacional bou direccion di e maestro Franklin Granadillo. Presentacion especial di e coro original cu a canta nos Himno pa prome biaha na 1976 oficialmente den Wilhelmina Stadion, cu ya ta net 40 aña pasa, bou di direccion di Maybelline Arends-Croes. Despues lo sigui e desfile di gruponan uniforma cu lo pasa dilanti nos mandatarionan brindando honor na nos bandera.

Ministerio di Cultura conhuntamente cu Departamento di Cultura y Comision Celebracion Dianan Nacional ta invita henter nos comunidad pa sali y demostra e amor pa bo patria cu cada un di nos tin pa Aruba. Hisa bo bandera y demostra cu bo ta un Arubiano. Na e establecimentonan un petition ta bay pa decora y mustra cu Aruba ta di fiesta. Hunto nos Celebra 30 aña Status Aparte y 40 aña di nos Himno y Bandera cu nos a logra como pais den gran forma manera un solo famia. □